

Topik: Tekem lelebet, livim samfala

Komuniti blong krab grou smol



Nem blong mi Karu. Mi stap wetem komuniti blong mi antap long hil long Neiyo. Mifala long komuniti ya, mifala save godaon long si wanfala taem long evri

ya. Disfala gogo ya, hem impoten tumas bikos long taem ya nao namba blong komuniti blong mifala baebae hem kamap staka moa.

Mifala olketa mere krab godaon long saetsi fo bonem bebi krab blong mifala. Bifoa mifala kasem saetsi, mifala save mitim staka had taem tumas. Yu save nao, pipol laek kaikaim mifala tumas ya!

Mi laek fo storim kam, wat nao hemi hapen long mifala las ya. Taem mifala gogo daon from bus nomoa, olketa pipol stat fo holem mifala an mifala traehad fo haed andanit long olketa drae lif blong kokonat. Mifala samfala ranawe insaet long olketa hol blong mifala. Nomata olsem, staka long


mifala nao olketa pipol holem olketa an putim olketa insaet basket blong olketa. Bat mifala no givap fo traehad fo kasem saetsi.

Nara samting nao taem mifala mek rere fo waswas, olketa pipol kam moa fo tekem olketa eg blong mifala. Olketa pipol save tekemaot evri eg blong mifala an mifala sore tumas bikos semtaem olketa kilim mifala dae tu.

Mi lake tumas bikos mi suim aot long dip si, dastawe nao mi no dae. Mifala stap long saetsi fo wanfala wik, bihaen mifala mas go baek long hom blong mifala long Neiyo.

Taem mifala kam baek kasem hom moa, mi barava sore tumas fo lukim dat mifala no staka nao olsem bifo. Taem mi go wakabaot long nara haos mi no lukim eniwan insaet long haos tu.

Taem ya nomoa mi barava sore tumas, bikos mi save dat namba blong mifala bae hemi no save kamap staka nao.





Komuniti blong Karu



Nem blong mi Karu.

Mi stap wetem komuniti blong mi antap long hil long Neiyo. Mifala long komuniti ya, mifala save godaon long si wanfala taem long evri yia. Disfala gogo ya, hem impoten tumas bikos long taem ya nao namba blong komuniti blong mifala baebae hem kamap staka moa.

Mifala olketa mere krab godaon long saetsi fo bonem bebi krab blong mifala. Bifoa mifala kasem saetsi, mifala save mitim staka had taem tumas.

Tokabaotem

1. ?Komuniti ya, hem stap long wea?
2. ?Olketa hu nao stei long komuniti ya?
3. ?Wae nao olketa krab mas go long saetsi?
4. ? Hao mas taem long wanfala yia nao olketa krab mas go long saetsi?



?Wae nao olketa krab save wakabaot wansaet?

Olketa string long wansaet leg long krab hem save waka wetem narasaet leg. Taem olketa string long wanfala leg hem pul narasaet hem pus.



Waka wetem wod

P p

Staka pipol laek kaikaim mifala tumas.



pipol
p

padol	putim
p	p

a	e	i	o	u
pa	pe	pi	po	pu
padol	pensol	pipol	popo	putim

Tingim samfala wod moa wea hem stat wetem 'p'.

Raetem olketa leta an wod ya insaet long buk blong yu.



P p P p P p P p P p P p P p P p

pipol piksa popo pilo pamken

Olketa pipol kam fo tekem olketa eg blong mifala.

Mi lake tumas bikos mi suim aot long dip si.



Raetem samfala samting wea yumi save duim fo mekem yumi garem staka krab long evri yia.



Samting hemi hapen las yia

Mi laek fo storim kam, wat nao hemi hapen long mifala las yia. Taem mifala gogo daon from bus nomoa, olketa pipol stat fo holem mifala an mifala traehad fo haed andanit long olketa drae lif blong kokonat. Mifala samfala ranawe insaet long olketa hol blong mifala. Nomata olsem, staka long mifala nao olketa pipol holem olketa an putim olketa insaet basket blong olketa. Bat mifala no givap fo traehad fo kasem saetsi.

Tokabaotem

1. ?Wat kaen had taem nao kasem olketa krab ya?
2. ?Hao nao olketa krab ya save ranawe taem olketa mitim had taem falom rod go long saetsi?
3. ?Wae nao olketa no save givap?




Krab hem garem tufala bik finga an eitfala smol finga. Baeksat blong olketa krab hemi kava wetem wanfala strong sela fo lukaftarem olketa samting insaet long bodi blong olketa. Olketa krab save aotem olfala sela an groum niu wan wanfala taem long evri yia.



Waka wetem wod

F f

Mifala traehad fo haed andanit long drae lif.



fren	fogud
f	f

a	e	i	o	u
fa	fe	fi	fo	fu
famili	fesim	filstore	fogud	fulap

Faendem olketa 'f' saon insaet long stori blong tude.

Raetem olketa leta an wod ya insaet long buk blong yu.



F f F f F f F f F f F f F f F f

fut fren fidim fulap foto fofala

Mifala no givap fo traehad fo kasem saetsi.




Sapos yu wanfala mere krab. Raet abaotem olketa trabol wea yu save mitim taem yu bonem eg an evrisamting yu save duim.



Dae blong olketa woman krab

Nara samting nao taem mifala mek rere fo waswas, olketa pipol kam moa fo tekem olketa eg blong mifala. Olketa pipol save tekemaot evri eg blong mifala an mifala sore tumas bikos semtaem olketa kilim mifala dae tu.

Mi lake tumas bikos mi suim aot long dip si, dastawe nao mi no dae. Mifala stap long saetsi fo wanfala wik, bihaen mifala mas go baek long hom blong mifala long Neiyo.



Tokabaotem

1. ?Wat nao bae hapen sapos no eni eg stap?
2. ?Wat nao samfala samting yumi save duim fo no finisim olketa krab an eg kuiktaem mekem namba blong olketa kamap staka an yumi garem olowe?

?Waswe yu save?




Staka deferen kaen krab stap long Solomon Aelan an kaen kantri olsem. Long wanfala ples long Vanuatu olketa kaondem fifti deferen kaen krab.



Waka wetem wod

E e

Olketa pipol save tekemaot evri eg.

	eg e
---	---------

evri e	enjin e
-----------	------------

e	e	e	e	e
eg	en	tek	ek	ke
eg	enjin	tekem	ekstra	lake

Tingim samfala wod moa wea hem garem 'u' insaet.

Raetem olketa leta an wod ya insaet long buk blong yu.



E e E e E e E e E e E e E e

evri eni emti enimi eniwan gele

Olketa pipol save tekemaot evri eg blong mifala
an mifala sore tumas.



Sapos yu wanfala mere krab. Raet abaotem olketa trabol wea yu save mitim taem yu bonem eg an evrisamting yu save duim.



Taem olketa kam baek long hom

Taem mifala kam baek kasep hom moa, mi barava sore tumas fo lukim dat mifala no staka nao olsem bifo. Taem mi go wakabaot long nara haos mi no lukim eniwan insaet long haos tu. Taem ya nomoa mi barava sore tumas, bikos mi save dat namba blong mifala bae hemi no save kamap staka nao.



Tokabaotem

1. ?Wat kaen samting long ples blong yu nao namba blong hem hem go-go daon an hemi no staka? 2. ?Wat nao samfala samting yumi save duim abaotem disfala samting mekem hemi no spoelem laef blong yumi long olketa nara yia fo kam? 3. Fo tekem kaikai yumi save duim long no gud wei an long gud wei. Samfala taem hem gud fo yumi tekem kaikai bat samfala taem hem gud fo yumi livim nomoa. Diswan hem no tru fo krab nomoa bat olketa nara samting tu olsem fish an totel an sela.






Waka wetem wod

V v

Staka haos blong olketa krab long vilij blong olketa hem emti.



volkeno
v

volibol v	vilij v
--------------	------------

a	e	i	o	u
va	ve	vi	vo	vu
barava	sevem	vilij	volkeno	muvum

Tingim samfala wod moa wea hem stat wetem 'v'.

Raetem olketa leta an wod ya insaet long buk blong yu.



V v V v V v V v V v V v V v

vilij volkeno muvum barava votem

Taem mi go wakabaot long vilij staka haos hemi emti. Namba blong mifala hemi go daon nao.



Raetem wanfala bik saen fo olketa pipol long vilij blong yu fo save hao fo tekem krab an olketa nara samting wea hemi kolsap fo finis long ples blong yufala.



Laef taem blong krab



Novemba/Desemba. Taem hem bik, 4 yia finis, man krab an mere krab go daon long saetsi fo mekem eg.

Mere krab go baek long hol wea man krab mekem an stap fo 12-13 de fo mekem eg. Eg blong wanfala krab save kasem 100,000.

Sapos hem mere krab bae hem garem gud mit moa fo kaikaim an bae hem redi fo mekem eg moa.

Long Desemba mere krab wasim eg long si, taem si kamap hae lelebet bifo deladet. Semtaem nomao eg hem brek an smol krab kam aot an stap long si fo kolsap wanfala mans. Long disfala taem ya mere krab no garem eni gud mit fo kaikaim.

Taem hem grouap kam, krab ya hemi sensim sela long baeksat blong hem wanfala taem evri yia.

Yang krab ya stap fo long taem insaed long hol an samfala taem nomoa hem goap long bus long taem hem ren.

Tri o fofala dei bihaen, disfala smol krab ya, hemi stat fo bik nao an hem kamaot from wata, den kamap long drae sanbis an sensim bodi blong hem an stat fo wakabaot goap long bus.

Long disfala taem ya, olketa smol krab ya, wea hem smol olsem anis, stap tugeta long saetsi an brid olsem fis.






Waka wetem wod

J j

Olketa woman krab wasim eg blong olketa long si long Januare.

Januare	Jun
j	j



a	e	i	o	u
ja	je	ji	jo	ju
Januare	Jenesis	jinja	jonson	Jun

Tingim samfala wod moa wea hem stat wetem 'j'.

Raetem olketa leta an wod ya insaet long buk blong yu.



J j J j J j J j J j J j J j J j

Januari Jenesis jinja Jun Jisas

Tokabaotem

1. ?Wat kaen krab nao yu save kaikaim long wat taem long yia? 2. ?Wat taem nao hem gud taem wea yu no save kilim dae eni krab?



Planem wanfala aksin abaotem olketa problem wea olketa komuniti blong krab fesim, an wat nao yumi save duim abaotem.